

KOHRAN UPA DINHMUN

Thuthlungthar Kohhranah hian, Kohhran upa dinhmun hi ilo thlir teh ang u. Bible hian Thuhiril leh Zirtirnaa thawkrimte chu dah pawimawh em em a, in enfiah nante pawh a tha ang e. “Kohhran Upa rorel thate chu a leh hniha chawimawi tlaka ngaih ni rawh se, Thuhiril leh zirtirnaa thawkrimte chu chawimawi tlaka ngaih leh zual ni rawh se,” (1Tim.5:17)



- Lalnghakliana CS
Ramhlun Vengthar Corps.

BIBLE-A RAWNGBAWLTU HMING HMASA-TE : Tirkkohte'n rawng an bawla, Rawngbawltute hming hrang hrang hetiang hian kan hmu: Diakonos, Presbyter, Episkopos tihte a ni. 'Diakonos' chu Kohhranho rawngbawltu tia lehlin a ni. (1Tim.3:8) 'Presbyter chu' Upa tia lehlin a ni.(TT 20:17) 'Episkopos' chu Kohhran hotu tiin an letling bawk.(1Tim.3:1; TT 20:28) Sapho chuan, 'Diakonos' tih chu Deacon tiin an dah a, Presbyteros (Presbyter)chu Elder an ti a, Episkonos chu Overseer an ti.

Phillippi mite hnena Paula lehkha thawnah chuan, “Kohhran hotute leh Rawngbawltute” tih a hming.(Phil.1:1) Chu chu Deacon (Kohhran upa) tihna a ni. Korinth lehkha thawnah chuan 'Tirkkohte' Thuhiriltute, Zirtirtute, tih kan hmu. (1 Kor.12:28) Ephesi lehkha thawnah chuan, Rawngbawltute hming 5 lai a lang a, Tirkkoh te, Zawlnei te, Chanchin Thuhiriltu te, Kohhran chawmtu te, Zirtirtu te tiin kan hmu.(Epesi 4:11-13) Thuthlungthar Kohhran hmasate zingah rawng-bawltu kan hmuh zawng zawngte chu: Tirkkoh te, KohhranUpa te, Zawlnei te, Chanchin Tha hriltu te, zirtirtu te, Rawngbawltu te, Kohhran hotute an lo ti ta a ni. Kohhran tiak tir hun lai kha chuan, inawp dan fel tak an la nei lova, ringtu an lo tam tial tial a, inrelbawl dan tha zawk an hmu chhuak zel a, Kum zabi 1na aiin zabi 2na hunah a lo fel zawk a, kum zabi 3 leh 4ah a fel chho tial tial ta a ni.

BIBLE-IN A DUHTUI : Kohhran Upa an thlanchhuah hmasak ber tum khan, Thlarau leh Finnaa khat, mi hming tha 7 thlang tura tih an nih kha.(TT 6:3,4) Mi zahawm, Kamtam lo Uaiin heh lo, Hlepna bawllhlawh duh lo., chhia leh tha thianga rinna thuruk pawm tlat mi, insum thei, Fate kilkawi thiam, Nupui

pakhat nei mi nih a ngai. (TT 6:3; 1Tim. 3:11,12)

RAWNGBAWLTUTE CHANVO ISUA ZIRTIR DAN : Lalna leh khawvel ropuina ni lo, Hna tlawm tak, eisiam leh chhiahhlawh hna ang a ni. “Mihring fapa meuh pawh rawngbawl tur leh mi tam tak tlan nana nun pe zawk turin a lo kal a ni si a.”(Mark 10:45; Matt.20:26) “In zinga ropui ber chu nau zawk angin awm se la, Lal ber chu rawngbawltu angina awm zawk rawh se,”(Lk.2:26)

KOHRAN UPA HMASATE THAWH DAN : Penticos hnuah ringtu an lo pung a, thuhirilna chu an tan a hautak ta. Tirkkohte khan thuhiril leh Dawhkana rorel hna an kawp vek. Upa an neih atangin rorelna chu Upate kutah an dah ta. Upa an thlan zingah thuhirilna hna thawk pawh an awm ve bawk. Stephana chu Jentail zinga thuhiril darhtu ropui tak a ni tih kan hmu.(TT 8:1-5)

UPATEN NIHNA HRE CHIANG ILA : Salvation Army-ah chuan, Sipai inkaihhruaina zul zuia kal kan nih avangin, Kohhran dangte'n “Church Elder” an vuah ang hi, Local Officer(Tualchung Officer) kan vuah a. Kohhran hmasa hun laia Deacon(Kohhran upa) kal zel tho kha a ni. Tirkkohte tanpui a, tuamhlawmtu dinhmun kha kan Local Officerte dinhmun a ni. Local Officer zawng zawngte hian thlarauah bul tan tha ila, neitu kan nihnaah hian inhlam thar theuh ang u. Kan hnathawh(Post)te dang mahse, ropui leh hlu bik awm chuang lovin, chhiahhlawh hna dik tak chu thawk ila, kan Officer(Puithiam)te nen pawh thawh dan phung inang chiah lo mahse, kal hrang thei erawh kan ni si lo tih hriain, inkawp tha takin i kal zel ang u.

CHIEF SECRETARY NOTES

Territorial Commander : Tun thla kalta chhung khan Colonel Lalngaihawmi chu Office hna bakah bial chhung leh bial pawnah te hna pawimawh avangin a tul hle a, heng thil tam tak ti thei tura Lalpa'n hriselna leh chakna te a pek avangin kan lawm hle.

Cadet Lawmluhna : Proclaimers of the Resurrection 2011-2014 Session thalai mi 14-te chu Ni 10 July, 2011 khan Territorial Commander in Kolasib Corps-ah lawmluhna a nei.

AIDS Lamendatation Day : Dt. 17th May, 2011 khan CHAN buatsaihin Chanmari YMA Hall-ah AIDS natna avanga boral tate sunna leh a tuar mektute puala sawipuina leh tawngtaipuina hun hman a ni a, hetah hian Territorial Commander chu khuallian niin Chief Secretary pawh thusawitu tura sawm a nih angin hun tha tak an hmang.

Territorial Songster Spiritual Retreat : Kolasib-a neih a ni a, he hun lawmawm leh hlawhtling takah hian Territorial Commander chuan Bible Message sawi tura sawm a nih angin hun hlu tak a hmanpui

Chennai-ah : Territorial Commander chu Board of Directors Meeting-ah June thla tawp khan Chennai-ah a kal a. Territory danga hruaitute nen hun tha tak an hmang a, Nepal ram a kan rawngbawlnate a hmunah endikna neiin a kal bawh. He hunah hian IHQ Legal consultant nen inhmu in Nepal rama sipai pawl registration te tihfelna hun an nei.

Chief Secretary : Pathian leh hruaitute duhsakna avangin Chief Secretary chu a tul thin hle a, Aizawl

khawpui Corps hrang hrangah hun bik nei inkhawmnate neiin hun a hmang a. Sorkar lamah MIZOFED Annual Meeting-ah hunserh a hmanpui a, Mizoram Cancer tuarte tawngtaina niah sawm a nih angin thuchah tha tak a sawi bawh.

TSWM : Lt.Colonel Kawlramthangi, TSWM chu a damlohna avanga TATA Hospital, Mumbai-a a kal chu hlawhtling taka check-up a niin in tawngtaina avangin Pathian tihdamna a chang a, sipai te amah khawngaiha tawngtai saktu zawng zawng te hnenah lawmthu a sawi a ni.

Malsawmna : Aizawl khawpuiah hmasawmna avangin Corps indang thar an awm zel a, chungte avang chuan tun lawk khan Tuithiang Veng-ah leh Zonuam-ah Biak In hmun tur leifel a ni ta a. Hetiang malsawmna te avang hian Pathian chungah kan lawm em em a, he veng pahnih a sipaite lawmna leh hlimna chuan min tilawm zual a ni.

Tlawhtu : Tun lawk khan Commissioner Kenneth Hodder te nupa leh Mumbai a Sipai Pawl Legal Adviser te chuan Aizawl rawn tlawhin Legal Seminar min rawn neihpui a, he hunah hian Officers leh Local Officers mi 200 dawn lai ten anmahni atangin malsawmna an dawng.

Engnge a sawi : *Khawvel hi mihringte hnena Pathian lehkha thawn a ni.*

Pluto

Lt. Col. Lalramhluna
Chief Secretary

INDIA RAMAH SALVATION ARMY KUM 129 A NI TA

India ram Punjab State-a Dharamsala District Bawrsap Mr. Frederick Tucker ICS chuan nikhat chu England-a Chhandamna Sipai Pawlte chanchin bu (war cry) a General William Booth-a Sermon “Kal la va sawi rawh” tih chu a chhiar fu hlahu mai a. He sermon hian Kristian tha tak mai, hna sang tak mai thawktu rilru leh nundante chu thlak danglam vekin, a hna kalsanin sapramah Chhandamna Sipai Pawl Officer hna training turin a kal tir ta a.

He Bawrsap hi chhungkaw ropui tak mai atanga lo piang a ni a, a pu (a pa pa) chu East India Company Chairman ni lai mek a ni in, hetih hunlai tho hian a pa chu Monghyr (Bihar)-ah Chief Commissioner hna sang tak chelh mektu a ni baw k a. A pu (a nu pa) pawh hetih hunlai hian British Royal Army-ah Brigadier General a ni mek baw k a ni. Heng hunlaia sapram leh India ramah mite zah leh dinhmun sanga ding ni si, Pathian kohna chhanga Sipai Pawl Officer tura a kal ta mai hi, hrethiam lo leh mak ti an tam nangiing mai.

Training a zawh hnuin rei vak lo IHQ-ah an thawh tir a, London khawpuia Corps pakhat a vawng tel baw k a, nimahse India rama mi tam takte thlarau lam nun a veina chuan Pathian tana hrehawm tinreng tawrh huamin India ramah Chhandamna Sipai Pawl din turin a lo kir leh ta a. Bombay a lo thlen ni tak, Gate way of India a lo luh ni chu 19th September, 1882 a ni a, tunah chuan kum 129 a lo ni ta.

Kum 129 chhunga hmasawwna te chu chanchin benglut leh ngaihnaawm tak tak, Pathian hnena lawmthu sawina tur a tam em em mai a ni.

Kum 129 a lo tlin hian hetiang hi India rama kan chanchin tlangpui chu a ni :

- (1) Officers - 3446
- (2) Cadet (Officer zirlai) - 88
- (3) A nghet a mi rawih - 2359
- (4) Corps/Kohhran - 4135
- (5) General Hospital - 9 (as of year book 2010)



- Lt. Col. Lalramhluna
Chief Secretary, IET

Kum 129 chhunga Pathianin India rama Chhandamna Sipai Pawl rawngbawlna a kaihhrui dan hi a ropuiin a ngaihsan awm ngei mai.

India ram Chhandamna Sipai Pawl chanchin kan sawi hian, a rawn dintu leh a pawlte chu Mingo ni hlawm mahse, India rama rawngbawlna an tan phat atangin India mite ngeiin bul an tumin a tangkai ber berah an tanga, India leh Ceylon (tuna Sri Lanka ni ta), Pakistan te huap veka Chief Secretary hmasa ber pawh ARNOLIS WEERASOORIYA a ni a, Buddhist sakhua atanga piangthar lehkhathiam a ni a, engkim kalsan vekin Pathian rawngbawlin a damchhung hun reilote chu Krista leh a ram tan a hlan vek a, tuihri nasa taka a len laiin, midangte a tanpuina lamah naupangte in Ropuina lamah a lo kaisang ta mai a, Mumbai-a i kal chuan Sewri-a Christian thlanmualah va kal la, he kan Chief Secretary hmasaber an phumna leh a thlan chu i va hmu anga, chutah chuan heti hian a inziak a :

IN LOVING MEMORY OF



ARNOLIS WEERASOORIYA
COLONEL SALVATION ARMY
PROMOTED TO HAVEN

18 MAY 1888

AGED 29

HIS FAVORITE MOTTOES WERE
“QUICK MARCH”

THE CROSS IS THE ATTRACTION
HIS LAST WORDS WERE

YOURS FOR THE SALVATION OF INDIA tiin.

Mumbai tlawhna hun remchang i neih hlauh chuan hmun hmingthang tak BORAVALI (Sanjay Gandhi National Park) va tlawh ngei la, chutah chuan Lung Tlang (Stone Mountain) i va hmu anga chutah chuan kum 1000 dawn kal taa hmasang miten chenna tura Puk an ker za lai i va hmu anga, chung pukah te chuan India rama Sipai Pawlrawn tan chhuaktu te khan, Bombay khawpuia In luah man to tak takte kalsana, tlawm taka an khawsak theih nan, chung lung pukahte chuan Missionary thinlung thuk tak pu in an lo va khawsa tawh a ni tih i hmuh a, i va hriat ngat phei chuan, he Chhandamna Sipai Pawl hi i

hmangaihna a zual ngei ang.

India ram pum chhim leh hmar, chhak leh thlang leh Central India te a rawngbawltu mite lawm leh hriat hlauh kohhran chu he Chhandamna Sipai Pawl hi a ni. Kohhran thenkhatte chu an bitna bialah bit hle mahse, Sipai Pawl anga India ram puma rawngbawl hi sawi tur protestant kohhran zingah hian an vang hle a ni.

Kum lo awm zel tur atan Lalpan Chhandamna Sipai Pawl malsawm rawh se.

KOHRANTE TLAKHNIAMNA

Salvation Army than zelna duhtute'n kum kal tawha year Book atanga kan zat chhiarna atanga chhutin kan tlahniam zel niin an ngai thin. Kan Kohhran invawn dan a that loh avanga kan pawl chauh hi tlahniam anga sawi erawh a dik lo. Kristian Kohhrante hi hmun thenkhatah kan pung vet thoa a lan lain, khawvel huapin Kohhran hrim hrim hi a tlahniam mek zel niin a lang.

Khawvel sualna thang mek zelah hian sualna a pung nasa a, ramtinah kristianna hian hniam lam (Number thu-ah) a pan mek zel niin a lang. Khawthlang ramahte phei chuan Biak In lian pui pui eng emaw zat chu luahtu awm lovin a ruak a, Biak In ruak lem loah pawh pitar/putar tlem tih loh chu thalai tumah inkhawm ve lohna a awm teuh tawh bawk. Hetiang kawngah hi chuan Chhandamna Sipai chu a ziaawm pawl tak kan la ni nghe nghe a, thalaite inkhawm loh tawpna Corps chu a tam vak lovang.

Kohhran dangte hi an statistic en tur (Year book/ Annual report) nei ila chuan, kum 10 kal ta atanga chhutin namber lam kiam ta telh telh engemaw zat an awm teuh ang. Chuvangin tumhmaa kan namber kan phak tak loh avanga tlahniam ta em em anga insawi hi a dik lovang. Hun a inher zel a, thanghlui kristian tha tak takte kha an liam zel a, thangtharte zingah sakhaw ngaihsak lohna leh rinna kawngah pawnglang taka kalna hi a zual zel avangin kristianna tlahniam zel hi thil awm thei tur a ni reng a ni.



- Lt. Col. Lalthlamuana (R)

ICO-a ka zirpui, Norway leh Sweeden atanga palaite ka kawmmaah, "Engtizia nge inramah kristianna hi heti em ema a tlak hniam a, Biak Inte khar ngai hial khawpa intlahniamna chhan ni ang?" tiin ka zawt a, An ni min chhanna chu, 'Sorkar that lutuk vang a ni, damlo ila, sorkarin engkim min tihsak a, fa nei ila, an lehkha zirna zawng zawng senso min tum sak vek a, hna thawh tur nei lote lah sorkarin hna hmuh loh man a pe bawk si a, thangtharte hian Pathian hi mamawhin an inhre lova, eng harsatna pawh nei se, Pathian hnena tawngtaia dil aiin sorkarah an mamawh chhanna an hmu zel si a, Pathian hi mamawhin an inhre lo a ni' tiin min chhang.

Khawvelin hma a sawn zel a, awlsamna min pe thei thilte hi a pung chho zel a., Pathian lam ngaihsak lohna hi thangtharteah apung tial tial a, Faroa thupek ang thurin Pathian thu hi zawm a harsa ta a ni e. thangtharte hi thlemtuin thiam takin a hruai mek a, urhsun taka Pathian thu awi thin thanghluite chu, 'A thing' an ti tawh a, thil

thar apiang an bawh huam huam a, Kristianna hian tlakhniam lam a pan hret hret zel lo thei lo a ni. Zawlnei Jeremian, “A tha a lawm, a tha alawm, an ti a, a tha hauh si lova” (Jer. 7:11) a tih ang mai kha thangtharte awmdan tam tak hi a ni ta. Chuvangin Chhandamna Sipai invawn dan leh hruaitute that loh avanga kohhran dangte aia tlakhniam ta bika sawi hi a dikin ka hre lo.

Chhandamna Sipai ngat phei hi chu, Sipai nihnain a phut(demand) hi a san em avangin tam takin an peih lo a ni. Kan ramah hian sipai nihna-in a phutte tlin zo thlawt lo, zuk leh hmuam pawh insum peih lote sipai roll-ah hian kan ziaak teuh avangin kan nambar hi Sipai dik tak aiin kan tam mai pawh a, sapho anga ‘Ni’ chu ni, ‘Nilo’ chu nilo ang khuan lang ve ngam ila chuan kan Territory-ah pawh hian kan nambar hi chu tuna mi zatve deuh thaw hian kan kiam mai lovang maw? Kan Corps theuhah hian, tehna dang lek lo pawhin, zuk leh hmuam ti lote chauh hi Siapai roll-ah dah dawn ta ila, kan Corps-a sipai namber hi tuna mi zatve vel awrh hi kan ni mai awm a sin. Army invawn dan that loh vang ni miah lovin.

Kan hlabu No 244 chang hnihna, “Mal min

sawm rawh, kan kawng ngei min zawhtir rawh” tih hi kan sa thin a, kan kawng ngei hi zawh ila, Sipai puanzar hi lungawi leh lawm tak zela zuiin, kan do chhan Lalpa tan ngei khan sipai-ah i ding nghet zel ang u aw. Kan kawng ngei zawh lova, Asapha fate fakna hla ang maia, “Kei erawh chuan ka rap pelh lek lek a” kan tih mai hi a hlauhawm a sin. ‘Midangte tihdan reng reng chu a eng amah i tive lovang u’ ka ti a ni lo ve. Thiltha na na chu kan kawng ngei zawh theih lohna thil a nih loh chuan zir ve zel pawh a sualna a awm lo, mahse kohhran dangte laka kan danglamna leh kan kawng bik hi chu i vawng nung zel ang u.

‘Chhandamna Sipai rawngbawl dan hi a tha a, an tihdan hi i tive ang u’ tih awm hran si lovin, thil (item) 19 laiah Mizorama kan kohhran thiante hian kan tihdan hi an ti chho ta zela zawk asin, an kohhran tihdan leh an kawng nena inmil lote tih lohah chuan. Army-in hma a sawn zel a, ram 124-ah MEI LEH THISEN PUANZAR hi zar a ni ta.

“Ka lawm sipai ka nih hi, Lalpa tan do turin, Thisen zara hneh turin nitin ka huai deuh deuh” tiin kan Manding Sap, Lal Isua enin hmalamah i kal zel ang u.

TLUKNA

‘Tlukna te avangin khawvel chung a pik e, tluknate chu lo awm tur reng zawng a ni a, nimahsela tlukna awm tirtu chung chu a pik e’ (Mt. 18:7).

Zoram Kristiante ah hian ngaihndan pawmdan tam tak a leng vel a, chung karah chuan kan hriatfiah atana pawimawh tak mai chu sual bul, tlukna hi niin ka hre fo thin. A bulah mi a chian chuan sawi dan, pawm dan tam tak karah buailo takin a awm thei ngei ang le.

Tlukna lo chhuahna bul ber chu LUCIFERA kan tih tak Isaia 14:12 a **Varparh, Zinglam Fapa** a tih hi a ni a, vantirhkoh zinga chungnung bika siam a ni awm e. Chu chuan Evi leh Adama a counselling a, Pathian chu bumtu zawkah a puh ta a ni (Gen. 3:1-5). Pathianin **‘I ei**



- Maj. K. Biakthuama, CO Hliappui Corps

chuan i ei ni la la in i thi ang’ a tih hi, tisa lungphu tawpna a ni lo, Thlarau thihna zawk a ni. Setana’n ava chhimbudawi a, ava biak mai theihna hi tisa hriatnaah hian a ni a,

Pathian chuan mihring chu thlarau-in a be si a. Rul chuan hmeichhe hnenah chuan thi teh suh e tiin a bum ta a nih kha. Tichuan, hmeichhia chuan thing rah chu a lo va, a ei ta a. Tin, a pasal a pe ve a, ani pawh a ei ve ta a.

Tin, Lalpa Pathian chuan *'Ngaitheh u, mihring chu a chhia leh a tha hriain, keimahni ang an lo ni ta'* a ti a (Gen. 3:22). Hei hi sap tawng Bible (Good News) ah chuan *'Now the man has become like one of us'* a lo ti a. *'A chhia a tha hriain, kan zinga mi pakhat ang an lo ni ta'* tih a ni zawk a ni. *'Lucifera ang an lo ni ta'* tihna a nih chu, tichuan an ei ni chuan an tisa chu a thi nghal lo ta reng anih kha. An thlarau erawh chu thi nghalin, Pathian nen an inzawmna chu a lo chat ta nghal a. Hmelma pa Setana chu mihring chhungah lutin a thunun ta zawk a ni. Lucifera'n *'thi teh suh e'* a tih kha an tisa ah a ni thung a, a dik ve bawh reng a ni. Hetih lai hian Evi leh Adama hian **thi** tih hi an la hmelhriat lo, tisa thihna erawh chu *'Vaivut i ni a, vaivut ah i kir leh tur a ni'* (Gen. 3:19) a tihna ah hian a ni ta chauh zawk a ni.

Awle, tisa thihna hi thihna bera ngaia hlau em em, thlarau thihna erawh hlau phak si lo-te hi kan va tam em! Chutia hmelma pa setana, ramhuai chu mihring chhunga a lo luh tak avangin Jacoba 3:14,15 chuan Khawvel taksa chakna hi ramhuai a mi a ni, a lo ti ta reng a ni. Tin, sawm leh pahnih zinga tel, Juda Iskariota an tih a chhungah chuan setana a lut a (Lk. 22:3). Tichuan, diabola'n mihring kawchhunga lutin a thunun tak tlat avangin diabola duhzawng tih chu an lo thlang ta zawk a. Bumna avangin thlang lo thei lo an lo ni ta zawk a ni. Hei hi Lucifera duhthlanna pumhlum ang kha a ni lo. Evi khan a duh reng reng lo kan ti lo, buma a awmna chuan a duh tir ta a ni. I Tim. 2:14 ah chuan Adama chu bumina a awm lova, hmeichhia erawh chu bumina a awm a, bawhchhiatna ah a tlu ta a. Pathian chuan Lucifera leh a tirhkohte chu chhandam leh pawh a tum reng reng lo. Chatuana an awmna turin Meidil a buatsaih sak ta zawk a ni *'Tlukna awmtirtu chung chu a pik e'*.

Pa pakhatin In sa-ah vai mistiri a chhawr a, tuk khat chu mistiri chuan *'Ka pu, pawisa min pe lawk ta che. Kan la inchwawr dawn chauh tho bawh a. Ka chungte an damlova, pawisa thawn ka duh a ni'* a ti a. A mamawh zat a sawi chu lo pe turin a nupui chu a ti a, a lo pe ta a. Mahse, chu vai mistiri chu a tlanbo ta daih mai a ni, pawina an ti hle mai a, an thin a rim. Mahse, a sawt tawh si lo, an nupahan indem vak tur chuang an awm lo, an duhthlanna pe a, pe lo thei chu an ni. Mahse, buma an awm miau vang a ni.

Awle, unau duhtak Pathianin a huat bera chunang leh kei hi kan ni lo. Keimahni chhunga thawk thintu thlarau sual hi a ni. Chu chu tihboral a tum ta a, a laka bo kan nih min hriattir hmasak te te a tum a. Thuthlung hlui ah Sinai tlanga thu sawm pek hmangin min hriattir phawt a, Thuthlung tharah duli bo, beram bo, fapa tlanbo hmangin min hriattir leh a. Chu mibo i nihna chhe deuh deuh chu a fapa Isua Krista nihna ah a bel ta a, fapa Isua Krista nihna chu i nihnaah a bel ta hlauh thung anih chu. Pa thinlunga i nihna chhe deuh i sim phak loh chun gaidam mai lovin a fapa Isua Kristaah a lo hrem hlum ta a, sim-ah min lo puang ta anih chu, Halleluiah, Lalpa chu fakina awm rawh se.

Mi thianghlim Augustine-a pawhin *'Sual chu kan hua anga, a titu chu kan hmangaih tur a ni,'* a ti a. Pathian hmangaihna chuan i sualna phuba chu fapa Isua Kristaah a lak tak avangin Thang chu a chhe ta a, keini hi kan chhuak ta hlauh a ni.

Unau duhtak, *ka piangthar thei lo i tih hi a dik e, pianna thar atan Krista a pe a che. Ka sim thei lo i ti a ni ang e, simna thar atan Krista a pe a che. Krista chu hmang zel mai rawh le,* Krista i hman tangkai zawh poh a leh Kristan a hmang tangkai zel thei tawh ang che. Krista hmang tangkai thei lote hi Pathianin a hmang thei lovang. Lalpan malsawm zel che rawh se.

PROJECTS- NEW IDEA

Kan Territory chhungah in leh lo lama hmasawna kan mamawhna a la sang hle a. Kum 18 chhung chauh Territory kan la nih avangin infrastructure tha kan la nei tlem em a ni. Chuvangin kan project chi hrang hrangte hi thiam tak leh uluk taka kan hman pawimawh a, rilru nei taka ruahmanna kan siam a ngai bawk.

Ram dang atanga tanpuina kan hmuh lian ber chu Mission Support Project hi a ni a. Heta tang hian biak in, quarters, YP Hall, School leh Territory tana pawimawh in dangte sak a ni a. Training, seminar leh workshop-te neih a ni bawk thin.

Tuna kan hmabak lian tak chu training college thar tur sak mek hi a ni. Kan mission support project zatve aia tam kumtin dah pawhin kum thum vel ah kan zo thei emaw chauh a ni dawn a. Kumtin tlem te tea kan sak chuan thil man to chho zel nan a man a sang lutuk ve thei bawk a. Chuvangin kan hotute rilruah chuan hma kan lo lak tawhnate hi zo fihlim thuai ila tih hi a ni.

Mission and Youth Centre pawh sak chhonzawm lohvin a awm reng a, hengte pawh hi zawh thuai a, hman tangkai thuai hi territorial headquarters duhdan a ni a. Heng bakah hian Home sak mek kan la nei bawk a.

Kan territorial Headquarters office hi a thuthluthlung hlui deuh tawh a, a lo daihzai zawk nan



- Major Vanlalfela
Projects Secretary

chei danglam tum mek a ni bawk. Heng zawng zawng hi kan kumkhat grant hmuh hian a daih lo nasa em em a ni.

Engtin nge ni ta ang? Division leh Corps-te hian kum hnih kum thum vel biak in sakna an dawn hi tihtlem ni ta sela, Territory pumpuiin a chhar theih tur hna thawh nan a hlawmin a hman theih dawn a ni. Tlem tlema sem sawm a, hna zo si lova hnut-chhiah thluah hian rorel tur a titam a, IHQ nena kan indawrna a titha lo va, Donor-te nena kan inkarah harsatna a siam thei a, Territory chak lo leh hna kalpui tha thei lovah min chhuah thei a ni.

Thingtlang kilkhawr ber thleng pawha cement concrete hmanga biak in sak kan tum hian sum a heh bawk. Kan architectural a la sang si lo va, kum 20/30 hnuah chuan mawi lo, nalh lo, tha lo a nih leh zel tho si avangin thingzai leh cement hmanga sak pawlh hi zir ila a thain a rinawm. Hmun awiha sa turte chuan cement concrete-in dawhzawl siam ila, chumi chhungah chuan thingzai hmangin mawi takin kan sa thiam ang. A chhungte pawh uluk takin kan chei thei bawk ang.



Photo

LEGAL SEMINAR

@ Ebenezer Corps

14&15 July, 2011

SHEKINA

“Tin, thu chu tisaah a lo chang a, kan zingah a awm ta a.” Johana 1:14



- L. Sanglura Sailo, C.S
Aizawl Bethel Corps

He thumal, SHEKINA han tih ngawt hi lar viauin lang mah se, kan Bible-ah hian hmuh tur a awm hauh lo thung a. Amaherawhchu chuti chung si chuan a bikin kan Bible Thuthlung Hlui-ah hian he thumal awmzia hian nghet takin bu a khuar lawi si a ni. Chutih rualin Thuthlung Thar lamah pawh vawi engemaw zat a lo lang bawk. SHEKINA tih hi Hebrai thumal, ‘SHAKHAN’ tih atanga lak a ni a, a awmzia chu, ‘cheng ve emaw awm ve’ tihna a ni. The Jewish Encyclopedia chuan, ‘cheng/awm tih bakah awmze dang, mihringte hnena cheng tura chung lam atanga rawn chhuk thla Pathian ropuina puanchhuahna,’ tiin a hrilhfiah a ni. Pathian ropui tak chu ama anpuia a siam lei mihringte hnena cheng turin a intihnam a, a mi Israelte hnenah meialh leh chhumdinga rawn inlan mai duh tawk lovin, Isua Krista-ah, tisiaa rawn changin mihringte zingah a rawn awm ta a (Matthaia 1:23; Johana 1:14). Kan Bible Thuthlung Hluiah hian Pathian awmpuina hi kawng hrang hrangin tihlan a ni a, Israelte Pathian chuan a mite zinga chena, a hming ropui tak chuan a mite zingah hmun pawimawh tak luahtir reng a duh a ni. An zinga a chen ve theih nan hmun thianghlim siamsak turin a hrilh fo bawk (Exodus 25:8).

Thuthlung Hlui hun laia Israelte chung a Pathian awmpuina (Shekina) tam takte zingah a langsar zual deuh chauh han tarlang ila. Pathianin a mi Israelte Aigupta bawih ata hruai chhuak tura Mosia a koh lai khan hmuh a ni a (Exodus 3:2-10). Hemi bakah hian vawi tam tak heng hmuna te hian Pathian chu chhum leh meialh ang te in hengah te hian a inlar a. Rames, Israelte awmna khawpui chung zawnah te (Exodus 10:23), Bible-a kan hmuh angin Israelten Aigupta an chhuah san atanga kawng tluanin (Exodus 13:21-22), Tuipuisen an kan naah te (Exodus 14:19), Sinai tlanga an awm laia Israel mipui tam tak hmaah te (Exodus 24:15-18), thlaler Biakbuk chhungah (Exodus 40:34-36) te a mite hnenah Pathian chu a inlan a. Heng bakah hian lal Solomona hova Temple a Thuthlungbawm an lak luh ni ah Temple chu luh theih loh hial khawpin Pathian Thlarau (chhum) in a

luah khat a (I Lalte 8:10-11, II Chronicles 5:13-14). Tin, Ezekiel a zawlnei ni tura koh a nih lai te, zawlnei anga rawngbawl tura tirh a nih lai (Ezekiel a 1:4; 3:23) te, Isaia zawlnei ni tura koh a nih lai (Isaia 6:4) bakah Daniela te thianho Sakeibaknei puka an awm lai leh meipuia paih an nih lai (Daniela 6:20; 3:20-25) te pawh khan Pathian ropuina chu a mite hnenah mita hmuh theihin a awm bawk. Heng lo pawh hi Thuthlung Hlui hunah he SHEKINA ropui tak hi sawi tur tam tak a awm a ni.

Kan Bible Thuthlung Tharah pawh hian vawi tam tak sawi tur awm mah se, a then a zar chauh han sawi leh ila. Khawvel Chhandamtu Isua Krista lo pian dawn khan khawchhak lam atangin Arsi a lo lang a (Matt. 2:2), Bethlehem daiah anmahni hmuh theih si lohvin Angel zaipawl ropui tak thawm hriat a ni bawk a (Luka 2:8-14), Isua vana hruai a nih lai (Tirh. 1:9) te, Penticost Niah (Tirh. 2:1-4) te, Saula koh a nih lai (Tirh. 9:3-4) te, Petera tanina a awm lai (Tirh. 12:7) leh Paula te Phillipi khua tanina an awm lai (Tirh. 16:26) te khan Pathian chu a mite hnenah tanpuitu atan a rawn inlar tih kan hmu bawk a. Heng hun pawimawh tak takah te hian Pathian rawngbawltu leh Pathian mite chuan a rawng an bawlsak Pathian chenpuina chawp leh chilhin an dawng thin.

Heng kan rawn tarlan tlemte atanga thil chiang tak lo lang chu chhum leh meialh hi Pathian awmpuina chhinchhiahna leh Pathian in amite a ngaihsakzia lantirna a ni a. Chhum, meialh, khawpui leh kawlphe te hian chunglam Pathian awmpuina an lantirin an lo rik chhuah chiah hian Pathian ropuina an lantir bawk a ni. Chung zawng zawng, Pathian inhriattirna hmanruate chu SHEKINA kan tih tak sawifiahna atan chuan hmang ta

ila. Chu chuan Pathian chu a mite hnenah a inlar a, an awm dan zawng zawng a hriatpui vek a, a kaihruai a, a venhim bakah an hnenah thu a sawi thin, an hnenah Pathian nung a nihzia a inhriattir baw k thin.

Khawvel chhandamtu, Isua Krista chu a lo pian hma kum 740 lai liam taah khan a hming atan Emmanuela sak a lo ni tawh a (Isaia 7:14; Matthaia 1:23). Emmanuela chu “kan hnena Pathian awm” tihna a ni si a (Matthaia

1:23). Hei hian hmana a mite hnena cheng ve thin Pathian chu a Fapa hunah taksaa an hnena a chen ve tur leh chumi hnua thlarauva kan hnena cheng reng tur a nihzia a tilang a. Keimahni zaw k hi a chenna tlak kan ni reng em tih kan inenfiah a ngai khawp mai. Chuvangin, kan thinlung hi Pathian chenna tlakin buatsaih ila, ani chuan englai pawhin kan hnena awm a inpeih reng a ni. Pathian chen vena tlak ni turin keimahni a tih thar leh ngai apiangte i din thar leh ang u.

PUITHIAM CHANVO

- *Nuhliri YPSM*
Khatla Corps

Israel faten Pathian tana an pek thilhlán zawng zawngte Arona leh a fate kumkhuaa an chanpual atan Pathianin a pe a ni. Tin, an thilhlán tinreng an chhangphut thilhlán te, an sual thawina thilhlante, an thiam loh thawina thilhlante leh an hlan turte nen lam Arona leh a fate pualah a pe a. “I Fapa te, i fanu te nen in kumkhaw chanpualah ka pe che u” a ti a ni (Numbers 18:8-11). Chuti anih chuan Israel faten Pathian tana an thilpek chu amah Pathian in Arona leh a fate tan kumkhua atan a pe a nih chuan Pathian hnena kan thilpek chu vawiin thleng pawn puithiam te chanvo a ni tih rinhlelh rual a ni lo. He thuthlung hi vawiin thlengin Kohhran thuthlung a la ni reng a, kan malsawmna hnar pawh a la ni reng a ni.

1. EI LEH IN : Israel faten Lalpa tana an pek, chhangphut thilhlán mai bakah Hriaktha berte, buh tha berte chu Lalpan Arona leh a fate ei atan a pe a ni (Numbers 18:12-14). Lalpan Israel fate hnenah, “Thlai hmasa berte, a

thaberte Lalpa inah in rawn keng tur a ni,” a ti a. Tin, chung an rawn ken chu an ei atan a pe a. Lalpa chuan puithiam te chu an ei atan a tha ber zel a ni pek a duh ni.

2. IN LEH LO RAM : Lalpan Mosia hnenah Levia chite tan chuan Kanaan ram an luh hunah an awmna tur khua siam sak tur leh an rantlatna tur atan a dai vel te nen siam sak turin a ti a ni. Tin, chhukunguate chu vanduai thilthu a tualthat palh te phuba latu in an thah lohna tur a an tlanna tur a ni ang tiin a sawi (Numbers 35:1-8). Tin, hnam hrang hrangten Levia chite awmna tur khua te chu khaw sawmli leh khaw riat a daivel te nen sahthlak turin ti a ni (Josua 21:1-42). Lalpa hian Puithiamte tan chenna tur in leh lo khua leh an ran tlatna tur nen lam a ngaihtuah sak a ni.

3. SAWMA PAKHAT : Melkisedeka’n Abraham a mal a sawm thu Genesis 14:19-ah kan hmu a, “Lei leh van neitu Pathian chungnung bera chuan Abraham a

malsawm rawh se” tiin. Tunge Melkisedeka chu kan tih chuan Pathian chungnungbera puithiam a ni tih a ni a. Tin, Abraham a hian Melkisedeka hnenah hian engkimah sawma pakhat pe tih kan hmu a. Sawma pakhat chungchang kan Bible a kan hmuhna hmasa ber chu Abraham a’n engkimah Sawma pakhat Melkisedeka hnenah a pe tih hi a ni a. Tin, Numbers 18:21-24-ah Pathianin Levia thlahte (puithiam) te chu an rawngbawl manah Israel rama sawma pakhat zawng zawng a pe a ni. “Ramchhunga mi sawma pakhat zawng zawng, lova thil hawngte pawh, theirahte pawh Lalpa pual a ni a, Lalpa tana thianghlim a ni” (Leviticus 27:30). Sawma pakhat pek loh thu a an bawhchhiatna pawh Malakia ah kan hmu a ni. Heng sawma pakhat zawng zawng Lalpa hnena an pek hi Lalpan Levia chite hnenah a pe vek a ni. Hei hi vawiin thlenga Kohhran tinrengten an la chhawm nun reng chu a ni a. Hetah hian Lalpa pawn a mite malsawm a tiam a ni.

4. **ROCHAN LEH CHANVO** : Tin, Lalpan Arona hnenah, “An ramah chuan rochan innei lovang a, an zingah chanvo innei ve hek lovang. Israel thlahte zinga i chanvo leh i rochan chu keimah hi ka ni” (Numbers 18:20) a ti a. Lalpan a mite hnenah a chanvo neih ve ang zawng zawng chu Arona hnenah a pe a ni.

Tu kohhran mah hian sawma pakhat hi Officer/Pastor-te hnenah an pe lova, Pathian hnenah an pe a ni.

Pathianin sawma pakhat a chanvo chu thuthlung hlui atangin vawiin thleng hian a rawngbawltu Puithiamte lawmman atan a la pe reng a ni. Pathian ram, Pathian chanvo sawma pakhat kan pek chu Pathian leh keimahni kar a kan tih tur a ni a. Mite Pathian ram lo hmangtu te an hmandan chungchangah anmahni leh Pathian inkar a ni ve thung e. Heng kawng hrang hrangah Pathianin a rawngbawl tura a koh puithiamte a humhalh a, an chung a thikthu chhiatna pawh a nasa a ni.

KRISTA THISEN A TAWK

Kan thlarau, rilru leh taksa damna atan hian Krista, Pathian fapa thisen hi a tawk a ni. Krista Thisena tlanna chu pawma, a thuawih mai chu kan awmdan tur anih laiin, thildang chhandamna atan sengluh tum kan awm thin. Pathianin a fapa thisen lo chu a pawm lova, a pawm ngai dawn lo reng reng a ni. Finna a thiltha mihringin a ngaihtuah chhuah chawp, tihdan tha leh puithuna thil zawng zawng hi chu a behbawm, baramosola an ni. Kohhran pawhin tihdan tam tak a chherchhuah te pawh hi tha viau mahse, zawm that avanga van kai inrinna ngawt chi a ni lo. Serhtan leh tan lohvin awmzia a nei lo (Gal. 6:15).

SUAL VANGA THIAMLOH CHANG : Paula chuan Rom khua a mite hnenah, mi pakhat thiltih sual avanga sual khawvela a luh thu leh thihnain mi zawng zawng a fanchhuah thu a sawi (Rom 5:12). ‘*Sual pakhat avangin thiamloh chantirna rorelna chu mi zawng zawng chungah a lo awm ...*’ a ti baw (Rom 5:18 (a)). Pathian thu awih

lova, Setana thu awih a, Evi leh Adama ten thei an ei ni atang khan mihring chuan a pa a lo thlak daih a lo ni. ‘*Nangni zawng in pa diabola hnena chhuak in ni a, in pa duhzawng tih in duh thin a ni...*’ tiin Lal Isua’n a sawi (Jn. 8:44). Mihring nun chu diabola zia (sual ‘sin’) chuan fan chhuakin ‘*Khawlohnaa din suala pai*’ kan lo ni ta hlawm a ni (Sam 51:5). Kan duhthlan leh kan duhna avang ni lovin, diabola fa, rul thlah-ah kan lo piang a. (Mt. 12:34). Ralte-ah te, Pachuau-ah te, Tochwawng etc. ah te kan lo piang a, kan duh avang lam ni lovin min thlahtute min thlah vang a ni mai. Chutiang chuan nu leh pa hmasaberte bawhchhiatna chuan sual khurah min hmuklut a, anmahni chhun zelin khawvelah kan lo inthlah pung ta a ni. Vawkin vawk a hring a, sial rangin sial rang a hring ta zel a ni. Kan tih leh thawh avang ni lovin thiamloh chantir sa, khawlohna a din suala pai kan ni sa a ni. Pa, Pathian hmaah chuan tenawm, laktlak loh, rimchhia, diabola rawngkai kan ni.

FELNAIN AWMZIA A



- PC Lianhmingthanga
Aizawl Temple Corps

NEILO : Akawl pui khenthlak anih hma chuan, bawhchhe mihring, felnain awmzia Pathian lamah a nei lo. Pawn lam lan dan, tawngkam leh chetdan felfai mahse chhungril lamah sual, diabola zia-in hmun a chang tlat. Pathian chu chhungril lam entu leh hmutlang vek anih avangin Evi leh Adama thlah felna, an tling zo lo a ni. Thlan pawn lam hnawih var, chung lam mitthi ruhte leh bawlhhlawh tinrenga khat ang lek kan lo ni thin (Mt. 23:27). Eden huan atanga hnawhchhuah tawh hringnun hi Lalpa’n a pawm thei tawh lova, tuaihnum thar a tum lo. Kross-ah a fapa Kristaah khawngaihna tel map lovin a hnawl a, a khengbetin a ching ral ta zawk a ni. Pathian fapa thisen chuan Pa

thinlung lamah zawk thiam min chantir a ni.

Nu leh pa thuawih a, a lang a mawi zawnga kan thatna hi tha ve fu mahse, Pathian lamah awmzia a awm lo. Kohhranah - KTP ah, TKP ah, SAY etc. ah theihtawpa inhmangin, mi fak hlauh thin mah ila Krista thisen tah anih loh chuan Lalpa'n a ngaidam thei lo. Israel fate chhanchhuah nan leh chhanhim an nih theih nan kawngka bianga Beramno thisen tah ani ang khan, Krista thisen tello chuan engmahin awmzia a nei lo. Israel fate tan kawngka bianga Beramno thisen a tawk ang khan Krista thisen chu kan tan a tawk a ni. *'Chu thisen ringtute chauh chuan Vanram an chang ang'* tih hla ang kha a ni e.

KRISTA THISEN CHAUH : Krista thisen chauh chu Pa-in a pawm leh a lungawihna anih avangin chu chauh chu kan rin tur chu a ni. Sual ngaihdam nan Krista thisen a tawk, thihna ata nunna kan neih nan Krista thisen a tawk, diabola thiltihtheihna hneh nan Krista thisen a tawk. Thim thuneihna laka min chhanchhuak turin Krista thisen a tawk, thiam loh chang tawhte thiam chantir leh turin Krista thisen a tawk. Thlarau, rilru leh taksa

damna atan Krista thisen a tawk, sual neilo mithianglim, Pathian fapa chuan kan sualna a phur a, kan tan a thisen a chhuak a ni. Sual reng reng hrelo chu keimahni avangin suala siamin a awm ta a ni (II Kor. 5:21). Krista thisen ringtu chu a chhuak ta hlauh a ni, thisen chhuah lova ngaihdamna reng awm lo chu (Heb. 9:22), Krista thisen chuan a chingfel ta.

'Aw thisen, thisen hlu, vankawng min hawn saktu Sual laka min tlan in, misual thiam min chantir' ka ti thei ta a ni.

'Tin, a nungte chu anmahni tan an nun tawh lohva, an thih aia thi a tho leh atan chuan an nun tawh zawkna turin a ni, mi zawng zawng thih aian a thih ni' (II Kor. 5:15) tih ang khan ringtu chuan a tlantu tan nun bul a lo tan thin a ni. Chhandam nan ni lo, Pathian tan thiltha ti turin, thianglimna nun kawng a zawh ta thin a ni. Krista thisen hi misualte chhandam nan a tawk a, *'Krista thisen thianglimah chuan misual ber pawh silfai kan ni, chu thisena silfai te chuan Jerusalem thar (Vanram) an lut ang'* tiin hla kan lo sa ta a ni.

ROPUINA A KAISANG COMMISSIONER HELEN CLIFTON

- Major Lalsangpuii
IHQ, London

"A mithianglim thihna chu Lalpa ngaihin hlu tak a ni"

Commissioner Helen Clifton vuina huna ka tel ve thei hi vannei ka van han in ti e m. Kan hriat angin Commissioner Helen Clifton hian natna khirh tak mai a tawrh avangin nikum kum tawp lam atang pheikha chuan office pawh a kal mumal thei



tawh lovin, in lamah General Shaw Clifton a farnu in awmchilhin a enkawl tawp kha a ni a. An retired hnuah engngemaw chen General leh a faten in lama an enkawl hnuah 19 May khan St. Christophere Hospice-ah dah luh a ni a, hemi hmun atang hian 14 June khan Van kohna chhangin 'Ropuina Ramah' a lo kaisang ta a ni.

Commissioner vuina hi 5 July (Thawhlejni) tlai dar 3.45 ah, Beckenham Creatorium-ah neih a ni a, Major Biran Slinn, Bromley Temple Corps Officer Commissioner in a vui a ni. Vuina hunserh zawh anih hnuah General-te pafa ho chuan an nu kuang bulah tawngtai



hona neiin, an nu duhtak, an hmangaih em em lei taksa chu vaivuta kir leh turin an thlahliam ta a ni.

Beckenham Crematorium a vuina neih zawh a nih hnuah hian, Ropuina-a kaisan lawmna leh Pathian hnena lawmthu sawina inkhawm William Booth Training College Hall-ah neih a ni a, he kaisan lawmna leh Pathian hnena lawmthu sawi inkhawm hi tlai dar 7.30 ah tan a ni, William Booth Training College Hall khatin mipui kan kal khawm a ni. Commissioner Barry Swanson, Chief of the Staff-in inkhawm hi a kaihruaiin, Commissioner Helen Clifton damlai hlimthlate thlir hona neih a ni a, a lunglenthlak hle mai! Inkhawmnaah hian Bromley Temple Corps zaipawl ten 'It is well with my soul' hla an han sa zet mai chu a van ropui em! Ropuina a kaisang ta lawmna inkhawm zet zawng a ropui dan a dang zar mai. Captain Lynne Clifton (an fapa Capt. Matt a nupui) leh Cadet Naomi Shakespeare (an fapa naupang zawk Cadet John-a nupui tur) ten Commissioner Helen Clifton puala Pathian hnena lawmthu sawi tawngtaina an nei a, Captain Marcus Collings (An fanu Captain Jenny pasal, anni nupa hi New Zealand Officer an ni) in Hebrai 13:1-13 chhiarin Pathian hnenah lawmthu a sawi a. Tin, an fate pathum, Captain Matt Clifton, Captain Jenny Collings leh Cadet John Clifton-ten an nu, an hmangaih em em chawimawina thu an sawi bawk. Heng an fate pathumin an nu an ngaihsanna leh chawimawina thu an sawite chu a van ropui em! - A mi thianghlim thihna chu Lalpa ngaihin a hlu a ni, he taksa thihna hi chatuana nunna bul tan a ni tih a tilang chiang hle mai. Tin, General Linda Bond thuchah Commissioner Sue Swanson, World President of Women's Ministry-in a chhiar chhuak bawk a ni. (General hi chawlh hmanga Canada-a a awmlai a ni) Enfield

Citadel Band-in rimawia 'Songs of Eternal' an han tum leh zet mai chuh, a van ropui em! he inkhawm hi mitthi sunna inkhawm ni lovin, Ropuina a kaisang ta lawmna inkhawm a nihzia a lang chiang hle mai.

General-te chhungkua hian thuchhuah siamin, vuinaa kal turte tumah pangpar keng lo turin an ngen a, pangpar aiah ralna an dawn ang ang te chu Commissioner Helen Clifton-in van kohna a chhanna hmun St. Christopher Hospice a pek a nih tur thu an chhuah a. Entawn tlak tak a van ni em, a kuang chung a pangpar, kuang siamtuten an chhawm tir bak pangpar pakhatmah dah a ni lo. Tin, a kuang khuhna Sipai Pawl Puanzar tlangah hian 'Promoted to Glory' tih a in ziaak kalh mai a, a ropui hle mai.

Commissioner Helen hi 4th May 1948 ah a lo piang a, 15th July 1967 ah Shaw Clifton nen an innei a, Shaw nena an inneih hian Helen hi kum 19 mi a ni. Kum 1973-ah Chhandamna Sipai Pawl Officer-ah commissioned an ni a, Sipai Pawl hruaitu lu bera thlan an nih hma hian rawngbawl na bial then zone hrang hrang pangaah an thawk kim vek a, tichuan, kum 2006 High Council a Commissioner Shaw Clifton Chhandamna Sipai Pawl General 18-na atana thlan a nih khan, Commissioner Helen Clifton chuan World President of Women's Ministry hna a chelh nghal a. Khawvel pumpuia Chhandamna Sipai Pawl hmeichhe rawngbawl na in hma a sawn theihna turin theihtawpin hma a la a, khawvel ram hrang hranga hmeichhe rawngbawl na pawhin nasa takin hma a sawn a ni.

Tin, Commissioner Helen Clifton hian mihring hmanga sumdawwna sual lian tak mai (Human traffick-



ing) do tura tanrual a pawimawhzia hriain, khawvel puma Sipai Pawl te chu do tura fuihin, chumi avanga tuartute chu chhanchhuah an nih ngei theihna turin nasa takin tan a la a, he sual do hian khawvel puma Chhandamna Sipai Pawl chuan nasa takin tunah hian hma a la mek a, India Eastern Territory te ngei pawhin kum 5/6 kalta atanga hma la tanin, tun hnai mai pawh khan Mizo hmeichhiate chhanchhuahna hna thawkin Mumbai thleng thlengin kan tlan thla rawk rawk a nih kha. Sual dona kawnga Commissioner Helen Clifton huaisenna hi a fakawmin a van entawn tlak em! An awmna veng, an mamawh lamna dawr pakhat phornography magazine an zawrh thin pawh zuar tawh lo tura a ngenna avangin chu dawr chuan an magazine zawrh thin chu an ti tawp a. Hei mai bakah hian an veng (Bromley local newspaper) nitin chanchinbu chhuaka a sex lam advertisement-an chhuah thin pawh, a chhuak apiang a chep thla zel a, chhuah tawh lo tura ngenna nen a thawn let zel a, thla engngemaw zat a thawn kir hnuah chu chanchinbu pawh chuan sex lam advertisement an chhuah chu an tihtawp phah hmak baw a ni

Active Officer nia kum 38 zet Pathian ram tana Chhandamna Sipai Pawl kaltlanga rawng an bawl hnuah, kumin 1st April khan an retired a, Retirement farewell service 24th March 2011 khan IHQ-ah neih a ni a, hemi ni hian Commissioner hi a rawn tel theih reng reng kan ring lova, amaherawhchu, rin loh tak maiin, chak lo chung

chungin a rawn tel ve mai bakah, a tih tur hlenin, a hmelah a na a ni tih a hriat ngawih ngawih a, tawng chhuah pawh atan a harsa em em chungin, an rawngbawlna hmun hrang hrang a Pathian malsawmna an dawnte hlim tak leh nui sanga a sawi theite kha a van han ngaihsanawm em.

General leh Commissioner-te hian fa pathum, mipa pahnh leh hmeichhe pakhat an nei a, Commissioner Helen Clifton vui tuk chiah, July 6 khan an fapa naupang ber Cadet John Clifton-an Chhandamna Sipai Pawl Officer nia Pathian rawngbawl tura Thuthung a ziahna ni a ni a, tin, ni 9th July khan Chhandamna Sipai Pawl Officer-a commissioned a nihna ni a ni. Tin, tun thla tawp lamah hian a session pui Lieutenant Naomi Shakespeare nen damchhung a Pathian rawngbawl dun turin an innei dawn a ni (He thu hi a lo chhuah meuh chuan an innei fel der tawh ang). He an fapa nuna hun pawimawh tak tak lo thleng turte hi a dam thlenpui theihna turin a rawngbawlpui leh thian thaten Pathian hnenah tawngtaiin kan dilpui thin a, mahse Lalpa remruat erawh engmahin a tihdanglam theih anih loh avangin heng a fapa nuna hun pawimawh tak tak te hi, natna leh hreawmnain a tihbuai phak tawh lohna vanram atanga hlim taka rawn thliz zawk turin a hnen lamah a lo hruai ta zawk a ni.

"Ka hmaah kumkhuain Lalpa chu ka hmu thin a, ka mangan loh nan ka dinglamah a awm a ni" Tirkhohte Thiltih 2:25.



CHANCHIN LAWRKHAWM

CYCLE RICKSHAW 3 DAWNG THAR :

Project kal tlanga Himalayan Division tana Cycle Rickshaw 3 pek chu, Ni 18th June 2011 khan Major Vanlalafela, Project Secretary chuan urhsun taka hlanna neiin, chhungkaw 3 tana eizawwna leh Division tan pawha income Generation a nih theih nan hman tan a ni ta. He ruahmanna thil thar vang hian Himalayan Division hruaitute leh Sipaite an lawm hle.

TEIREI FOREST SA SCHOOL TANA

THILPEK : Teirei Forest-a Salvation Army School Naupangte tan heng a hnuai a mite hian School Uniform an lei sak a, thawktute, naupangte leh an chhungte an lawm hle. Thilepek hlantute chu: Pi, Lalduhlaii Teirei, Pu Biakmawiaa SAYLeader, Pu VL Pachhunga SC.

BIBLE CHHIAR CHHUAK

LAWMMAN BUATSAIH : Central North Division chuan, Division re-inforcement Brigatehmalaknain Kum 2011 chhunga Holy Bible chhiar chhuakte tan lawman an buatsaih a, a chhiar chhuak apiangte chuan DQ-ah report pe zel turin an ngenin an hriattira ni e.

AIRPORT CHAPLAIN OFFICE TAN

SOFA THUTHLENG PE : Pu Vanlalruata Ralte chuan Airport Chaplain Office tan thuthleng (Sofa set) mawi leh tha tak mai a pe a, thawktu leh THQ hotute a chungah an lawm hle.

COMPUTER-CUM-STUDY ROOM

HLANNA : Ni 5.6.201 khan, Blind School Kolasib tana Computer leh an zirna room tur sak zawh thar chu, Colonel Lalngaihawmi TC chuan hlanin a hawng. He Programme pawimawh tak hi, Territorial Envoy Joshep Rintluanga te nupain, Western Division hruaitu leh Blind Managing Board-te chuan tawiaawmin, Territorial Songster-te chuan Pathian fakna hla sain rawngbawlna hun hlu tak an hmang.

BLIND HOSTEL, KOLASIB TANA

THIL PEK : Chaltlang CorpsLOM chuan Washing machine tha tak an pe a, Aizawl Bazar Corps SAY chuan Sound Box leinan Rs 1000/- an pe a, hengah tarlan

zui dangte hian regular takin Blind Hostel tan Donation an pe reng bawk. Chung mite chu: Pu VL Siana Parte Kiolasib Diakkawn, PU Lalneihkima Aizawl College Veng, Pi Helen Chhingpuii Bungkaw, ITI Corps atangin Senior Corps leh Home League te, Ebenezar Home League te an ni a, an chungah Incharge Officer-te leh Managing Board-te an lawm hle. Kumin pawh hian Blind School-a zirlai Emanuel Hosana chuan HSSLC III Div.ah passed-in, Thanghmingliana pawhin HSLC II Div.ah a passed bawk a, mi tlawmngai leh inphalte vangin malsawmna an la dawng zel a ni Heng bakah hian Corps leh mimal hnen atangin thilpek an dawng reng bawk.thin

WESTERN DIVISION OFFICERS RE-

TREAT : Ni 8th-10th June 2011 khan Western Division-a Officer-te chuan, Officer Training College Kolasib-ah riak lutin Retreat an nei. Division chhunga Officer-te an kal tha hle a, Naute nena kal pawh chhungkaw thum lai an tel. Retreat-ah hian, Officer 27 leh Cadet Field Training nei lai mekte nen an hmang. Major S.Biakliana DC chu Speaker a ni a, Major Lalliankunga EO Training College chuan Bible Study a neihpui bawk thin. Final Meeting-ah DC chuan thuchah sawiin, Officer rualten malsawmna an dawng nasa hle a, Zahngaihna Dawhkan hawn a niin, Officer zawng zawngte chuan Pathian hnenah thu tiam thar lehin an inhlan a, an hlawkin an hlim tlang hle. He retreat neih nan hian OTC Hostel leh Chapel-te chu phal taka Principal leh Staffte'n an hman tir avangin leh Camp chhung zawnga eirawngbawl saktu, DHQ Staff zawng zawngte chungah lawmthu an sawi bawk

MONSOON OPERATION :

Central North Division Officerte fehchhuah thawh hnihna, Ni 18-19 June 2011 chu hlawhtling takin neih a ni a, Officer kal chhuakte atangin report benglut tak tak Ni 24.6.2011 khan, Aizawl BazarCorpsah, Central North Division chhunga Corps leh Society tina Missionary Board ngaihthlak a ni.

CENTRAL NORTH DIVISION OUT-

REACH : Ni 24.6.2011 khan CentralNorth Division

chhunga Corps leh Society tina Missionary Board OB koh khawm a niin, Outreach hmalak zelna tur an ngaihtuah.

PRAYER SEMINAR : Tawngtai chungchang zir hona ni hnih awh, Ni 25,26, June 2011 khan Central North Division chuan Chanmari Corps-ah neiin Corps hrang hrang 34 atangin palai 104 lai an kal khawm. He seminar final meeting hi Lt.Colonel Lalramhluna Chief Secretary leh THQ staff thenkhatin an hmanpui a, mi tam tak zahngaihna thutphah hmaah kunin, Pathian tan an nun an hlan thar leh a ni. He Seminar hian kumin 2011 chhung hian tawngtai khawmpui neih ngei nise tiin thutlukna an siam zui.

MEMBER THAR LAWM LUT : Tuidam CO Major Lalthianghlina chuan Kawrthah Corps-ah mi 6 leh Tuidam Corps-ah mi 25 lai member thar a lawm lut.

PUANTHUI ZIRCHHUAK : Central North Division Tailoring Centre atangin mi 7 chuan Puanthui zir zovin, Ni 29.6.2011 khan Maj. Vanlalauvi DDWO chuan Certificate a hlan.

CHHAWRTUI CORPS-AH CAMPING HLAWHTLING: Ni 28.5.2011 Inrinni khan Isua thiante Team kalin, zan atangin pre-Camping Crusade Sunday zan thlengin neih a ni. Ni 30.5.2011 thawhtan zan atangin Rawngbawltu camp buatsaih nghal a ni a, rawngbawltu camp chhuah zan atangin mipui tan Camp buatsaih leh nghal a ni bawk. Naupang lang camp-tenen camp hi chhawng nga buatsaih a ni a, he camp-ah hian puitling 274 an lut a, kohhran hrang hrang, PCI, Roman Catholic, UPC Mizoram, UPC NEI atangin mi



Sipai Nangau September 2011

thahnem tak an lut. Pathian Thlarauvin rawngbawltute hman hian A hnathawh a thlen nasa hle a, hlim taka he Camp chhawng nga hi hman a niin, Ni 17.6.2011 zirtawp ah zawh a ni. Camp buatsaih anih vang hian YMA Day pawh hman tura ruahman Programme te pawh thulh a ni a, Pathian Thlarau Thianghlim hnathawh a thleng nasa hle a ni. Taksa chetna pawh tleirawl leh rawlthar lamah a thleng nasa a, tunah pawh hian kohhran hrang hrangah Pathianin hna ala thawk zel a, inkhawm nuam an tiin an hlim tlang hle. Camping senral leh mamawh pawh kohhran unau dangte hnen atangin an dawn tha hle.

Dt 19.6.2011 tlaiah Corps buatsaihin khawtlangin hnehna kawngzawh leh mual inkhawm neih a ni a, hetah hian chhiar theih chinah mi 500 chuanguin kawng zawhin, mual inkhawm an nei a, Pathian hnathawh nasa tak lang chhuakin khawlaiah Pathian fakin an lam mup mup mai a ni.

CHHAWRTUI CORPS : July 2, 2011 Founder's Day khan Chhawrtui Corps chuan Pathian hnenah lawmthu sawina ruai an buatsaih a, Thlarau lam leh Tisa lam ruai hi hlim tlang taka kilin hun an hman.

SPEAKER (EVANGELIST) TRAINING NEI : Central North Division chuan Division reinforcement Brigade hmalakna hnuaiah Speaker Training ni khat awh, Ni 30.6.2011 khan an buatsaiha, mi 25 an kal khawm. He Training-ah hian Thlarau lam nun chungchang leh Salvation Army Thurin zirho a ni.

PUANTHUI ZIRNA TAN LEH TA : Central North Division chuan, Division Women Ministry hmalakna hnuaiah July 2011 atangin, thlaruk chhhung atan Puanthui zirna mi 12 tan an tan leh ta. Hetih rual vek hian THQ-ah pawh mi 15 chuan an zir tan leh bawk.

DARLAWN NORTH BIAL : Tunhnai, thla hnih kalta May-June 2011 khan Darlawn North Bial Corps hnih, Central Corps leh North Corps te hi, Pathian thlarau thianghlim khawih tharna changin an hlim em em mai a, inkhawm boruak pawh a hlimawm in, C.O te nupa leh Local Officer ten lam tualah hma an hruai a, inkhawm pawh zan dar 10:00 pm vel ah an bang thin a ni. thilpek pawh a pungin, Darlawn Central Corps ah han ₹ 15000.00. atanga ₹ 20000.00. vel ni thin kha July' 11

Silai mu lakkhawmah ₹ 39000.00. lai niin, Darlawn North Corps pawh ₹ 10000.00 atanga ₹ 15000.00. ni thin kha July' 11. Silaimu lakkhawmah pawh ₹30000.00. a tling thuak a ni. Thilpek ki hrang hrang pawh a pung a, Sipai inkhawm pawh za laite kan inkhawm thin a ni.

DARLAWN NORTH CORPS

FOUNDERS DAY : 2nd July' 11 khan zingkarah Darlawn Damdawiin damlo tlawhin, damlote hnenah thilpek an hlan a, Zing chaw ei khamah nilengin Sailutar Society thuanawp tawh chu dinthar leh turin (Ratu C.O Bial ni thin kha Darlawn North C.O bial atan DC in a rawn tih tak avang in) hnatlang nilengin an nei a, mi 44 thawk chhuakin Sailutar atangin mi 10 rawn hnatlang baw in, tlaiah Ruai kil hona an nei baw a ni. Sailutar Society Biak in hungchhungah hian BSNL lam ten Telephone Pipe lian pui pui an lo dah khah vek avangin hmundang a dahsawn hnatlang neih a ni. Zan ah Biakin ah Founders Day pual inkhawm neih a ni a. Corps chhunga Section zawng zawng ten Corps Council in a lo rel angin Zaipawl neiin hla an rem vek a, Maj.Pc.Lalduhawma C.O hnen atangin SA chanchin leh thuchah tawi ngaihthlak a ni.

SAY SUNDAY : Dt.18/6/11. zing kar atang khan SAY Sunday hi hman tan a ni a.zing karah Bible thu ziaq hrang hrang khaw chhungah tar ani a . Nileng in Biakin ah Spiritual Day hman a niin, tlaiah chaw ei ho nghal a ni. Tin, Sunday chawhma leh Zan thlengin hun hman a ni baw a, solo, Male voice leh Skit-te ngathlaka en a ni a.Pu Lalrinsanga Leader hnen atangin thuchah tawi ngaihthlak a ni. SAY Sunday a puan atan, 2011 thupui hmanga Article in ziah siakna Result puan aniin, lawmman sem nghal a ni.

Pakhatna. Pu R.Lalruatfela Secy. - ₹ 500.00. leh Certificate.

Pahnihna. Pu R.Lalramhluna Asst.Leader. - ₹ 300.00. leh Certificate.

Pathumna Tv.T.Malsawmtluanga Asst.Secy. - ₹ 200.00. leh Certificate.

Consolation Prize mi 5 hnen ah ₹ 50.00. theuh hlan an ni bawk.

DARLAWN CENTRAL CORPS

FOUNDERS DAY : Tunlai an hlim hle mai a, chuvangin Pathian hnena lawmthusawina hun bik buatsaih

ni se, ti a C.O-in a rawt angin Corps Council chuan a hun atan Salvation Army Founders Day nise tiin a rel a. Corps pawisa hmang mai lovin a thei thei ten thawh khawm nise tih anih angin ₹ 13000.00. lai a tling khawm a, Corps pawisa nen Pathian hnena lawmthu sawina ni atan hman ani a. Chawhma inkhawm hun buatsaih a ni a, Chhungkaw khat, member 7. Pawl ah lawm luhna leh thuchah tawi Major PC Lalduhawma Bialtu Commanding Officer-in a nei Chawhnuah Biak Inah Pathian fakna hla sa a zaikhawm a niin kan hlim hle mai. tlaiah chaw kil ho a ni.

SAY SUNDAY : Dt.18/6/11(Sat) atang khan Darlawn Central Corps pawh hian hman tan a ni a. Chawhma lam in tawngtaia Bethel na hun atan hman aniin, chawhnu lamah Indoor Games hrang hrang Darlawn Community Hall-ah neih a ni a, Zai hona leh infuihna hun hman ani. tlaiah chaw ei ho nghal a ni. Sunday chawhma leh zanaq SAY Sunday puala inkhawmna neih a ni a, SAY Songster ten hla an remin, Leader leh Asst.Leader ten thuchah tawi an sawi a ni.

BLUE MOUNT ENGLISH MEDIUM HIGH SCHOOL :

Blue Mount English Medium School -ah Pathian malsawmna tam tak kan dawng. Kum 2011 Madhyamik(Class X) result duhawm tak mai nei lehin, a wawi sarihnana atan **100%** an passed leh a, kan lawm hle mai. Sorkar lama min Bialtu MLA pawh a lawm em avangin Hostel naupang stipent seat 25 min pek belh tawp mai a, kan lawm hle a ni. Tin, Division huap Monsoon Operation neih naah Captain T. Lalringngheta leh a thiante school tan malsawmna rawn thlentu an ni. Dr. Jeremy hovin Hostel tan Free Clinic min neih sak a, naupangte'n an tangkaipui hle a, an chungah lawmthu kan sawi tak meuh meuh baw a ni.

